



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

Lp  
15  
8.81

No. 319a

Lp 15.8.81

BIBLIOTHECA  
RUM GRAECORUM ET ROMANORUM  
TEUBNERIANA.

A. PERSII FLACCI  
SATIRARUM LIBER.

EX RECENSIONE

CAROLI FRIDERICI HERMANNI.



LIPSIAE  
IN AEDIBUS B. G. TEUBNERI.  
MDCCCLXXXI.

Lp 15.8.81

Harvard College Library



PERSIUS COLLECTION

GIFT OF  
MORRIS HICKY MORGAN  
(Class of 1881)

PROFESSOR OF CLASSICAL PHILOLOGY

JANUARY, 1910





**A. PERSII FLACCI**  
**SATIRARUM LIBER.**

---

EX RECENSIONE

**CAROLI FRIDERICI HERMANNI**



• LIPSIAE  
SUMPTIBUS ET TYPIS B. G. TEUBNERI  
MDCCCLXXXI. •

Lp 15.8.81

Harvard College Library  
Gift of  
Morris H. Morgan  
Jan. 1, 1910

**GODOFREDO BERNHARDY**

**VIRO ILLUSTRISSIMO**

**HUNC LIBELLUM**

**PROBARI CUPIT**

**EDITOR.**





## PRAEFATIO.

De Persio quidquid novimus fere habemus ex antiqua vita, quam codices de commentario Probi Valerii sublatam praedicant, alii fortasse ad Suetonii Tranquilli librum de viris illustribus referre malent, quem tamen ipsum Probum auctorem sequi potuisse O. Jahnus in Ritschel. Parerg. Plautin. p. 618 et Th. Mommsenius in Comm. Soc. lit. Lips. T. I, p. 677 docte monuerunt; hanc igitur presse secutus, quoniam etiam de poeta ipso novae Satirarum illius editioni aliquid praemittere redemptor honestissimus voluit, quae mihi praeterea ad hanc praefationem pertinere visa sunt, aut literarum formis distincta ipsis veteris grammatici verbis interposui aut ad finem quanta potui brevitate subjeci.

Natus igitur est Aulus Persius Flaccus pridie Nonas Decembres Fabio Persico Lucio Vitellio consulibus, qui annus erat p. Chr. n. 34, u. c. 787; decessit VIII Kalendas Decembres Publio Mario Asinio Gallo consulibus, id est p. Chr. n. 62, u. c. 815, unde ne duodetrigesimum quidem annum integrum eum complevisse intelligimus. Natus est in Etruria Volaterris eques Romanus, sanguine et affinitate primi ordinis viris conjunctus, quo ex genere non dubitamus quin etiam Lucilii ille aequalis fuerit, quem Catulus apud Cic. Orat. II. 6. 25 omnium suae aetatis hominum doctissimum appellat eidemque nonnulli, teste Cic. Brut. 26. 99, orationem a Fannio contra C. Gracchum habitam tribuebant; — decessit autem noster ad octavum miliarium via Appia in praediis suis, quae sunt qui Sat. VI. 55 respici putant, quanquam alia quoque in Etruriae contiguaeve Liguria ora eum possedissee ex ejusdem satirae principio facile colligimus. Pater ejus Flaccus pupillum reliquit moriens annorum fere sex; Fulvia Sisennia mater nupsit postea Fusio equiti Romano et eum quoque extulit in

*paucos annos, unde probabile est nostrum in ipsis vitae primordiis domesticis calamitatibus conflictatum variisque pueritiae suae rectoribus usum, mox destitutum, prius quam alii solent ad eam ingenii maturitatem pervenisse, quam in adolescentuli satiris non sine admirationeprehendimus. Studuit Flaccus usque ad annum duodecimum aetatis suae Volaterris; deinde Romae apud grammaticum Remmiam Palaemonem, quem Sueton. Ill. gramm. 23 principem in sua professione locum tenuisse testatur; et apud rhetorem Verginium Flavum, etiam Quintiliano passim commemoratum quemque Tacitus Ann. XV. 71, quia studia juvenum eloquentia fovisset, propter claritudinem nominis simul cum Musonio a Nerone urbe pulsum esse tradit. Sed et illius exilium post mortem demum Persii contigit et L. Annaei Cornuti, cujus hic, quum esset annorum sedecim, ita amicitia uli coepit, ut ab eo nusquam discederet; a quo quod vitae scriptor eum inductum aliquatenus in philosophiam esse ait, ipse Persius in quintae satirae principio cum tanta pietatis et grati animi testificatione confirmat, ut huic inter omnes poetici ardoris principatus concedi debeat. De ipso Cornuto pluribus disseruerunt et Ger. Joa. de Martini in Spec. inaug. Lugd. 1825. 8. et Fr. Osannus in Praef. libri de natura deorum ab ipso Gotttingae 1844 editi: quorum in disputationibus hoc tantum miror, quod hominis Leptitani verum nomen Cornutum fuisse arbitrati sunt Phurnutumque, quem passim et Scholia et codices praebent, adeo spreverunt, ut hanc nominis formam ex solo pronunciandi vitio librariorumve errore repeterent; equidem ubi frequentem vocalis u in oppidis Africae usum reputo, prorsus mihi persuadeo Afrum origine Phurnutum potius appellatum esse, donec in civitatem Romanam Annaeorumque gentem receptus barbaram vocem in latinae speciem converteret eodem exemplo, quo principem Apostolorum Hebraeo nomine Saulum, Romano Paulum fuisse constat. Quae autem in ipsis nostrae vitae codicibus mox incommodo loco inserta leguntur: nam Cornutus illo tempore tragicus fuit sectae poeticae, qui libros philosophiae reliquit, tam inepta sunt, ut eliminari ea cum Bergkio in Zeitschr. f. Alterth. 1845, p.*

125, quam emendatricem operam ludi satius esse videatur; mihi certe nec *grammaticum* pro *tragico* Prellerus ibid. 1846, p. 43, nec *tempore tragico* Osannus in Philol. T. II, p. 384 probavit, utque concedam tragicum poetam Cornutum cum Welckero griech. Tragoed. p. 1457 haberi vix posse, illud tamen, quod rei unice convenire jam Pithoeus intellexit, quomodo cum literarum vestigiis conciliem, aegre invenio. Nimirum *Stoicae* sectae magister Cornutus fuit eaque disciplina etiam Persium ita imbuat, ut neque hujus satiras sine illius philosophiae notitia intelligere possis neque *Stoicae* doctrinae sinceriores interpretem facile invenias; immo plurimas ejus disputationes propius ad scholae praecepta quam ad ipsius vitae usum accedere haud immerito dixeris, utque sermonem Persii innumeris in locis ad Horatii imitationem conformatum esse docta Casauboni sollertia comprobavit, ita sententias plerasque iisdem paene verbis apud Epictetum aliosque auctores *Stoicos* redire ejusdem commentarii manifesto arguunt. Quod non in obtrectionem vel invidiam Persio conflandam dictum esto, tanquam aliena magis quam sui ingenii virtute poeticam laudem adeptus sit; cujus ingenuus fervor et vehementia summis quibusque ausibus apta hac ipsa re apparet, quod etiam quae extrinsecus acceperat, ita in succum et sanguinem convertit, ut nisi aliunde edocti omnia ipsius inventa existimarem; hoc tamen salvo ejus honore contendere mihi videor, poetam illum a natura, satiricum ab arte potius et schola factum esse.

Sed ut ex diverticulo in viam redeam, *amicos Persius habuit a prima adolescentia Caesium Bassum poetam*, quem solum Quintilianus X. 1. 96 dignum judicavit qui Horatio adjiceretur, *et Calpurnium Saturem* vel ut Casaubonus maluit *Suram*, *qui vivo eo juvenis decessit*, idem tamen, si Sarpium audimus Quaest. philol. p. 11 sqq., eclogarum scriptor, quae nunc Calpurnii Siculi nomine feruntur, quanquam id commentum nuperidoneis argumentis impugnatum est; *coluit autem ut patrem Servilium Nonianum*, principem civitatis, ut appellatur a Plinio N. Histor. XXVIII. 5, quem et morum probitate et dicendi facultate inter

paucos clarum certatim veteres laudibus suis extulerunt, cf. Quintil. X. 1. 102, Plin. Epist. I. 13. 7, Tac. Ann. XIV. 19 etc., eidemque, ut videtur, Plotii Macrini notitiam debuit, *hominis sane eruditi*, ut Scholiastae verbis utar ad Sat. II. initium, quae satira ipsi Macrino dedicata est, *paternoque se affectu diligentis, qui in domo Servilii didicerat, a quo agellum comparaverat indulto sibi pretio aliquanto*. Praeterea cognovit per Cornutum etiam Annaeum Lucanum, Pharsaliae scriptorem notissimum, *aequaeque auditorum Cornuti*; sed quamvis suppar aetate Lucanus, quem p. Chr. a. 38 natum fuisse constat, adeo mirabatur scripta Flacci, ut — si recte Prellerus l. c. grammatici verba ex librorum vestigiis restituit — *vix retineret se recitantem a clamore, quin illa esse vera poemata diceret, sua ipse ludificaret* (vel suos sc. versus ludos faceret). Sero cognovit et Senecam, sed non ut caperehatur ejus ingenio, quod ut in adolescentem Stoicae sectae et ipso dedito mirum videri possit, propius intuenti magnam et incorruptam hujus judicii sanitatem approbabit, ut qui jam tum intellexerit, quod posterius de Seneca judicarunt, in scriptis ejus res atque sententias aut inepto inanique impetu esse aut levi et quasi dicaci argutia, eruditionem autem vernaculam et plebejam nihilque ex veterum scriptis habentem neque gratiae neque dignitatis, cf. Gell. N. Att. XII. 2. Denique *usus est apud Cornutum duorum convictu virorum et doctissimorum et sanctissimorum acriter tum philosophantium, Claudii Agathini* (ita enim Osannus p. XVIII librorum lectionem Agathurini docte emendavit) *medici Lacedaemonii et Petronii Aristocratis Magneti*, quos unice miratus est et aemulatus, *quam aequales essent, Cornuti minores id est discipuli et ipsi*. Idem etiam decem fere annos summe dilectus a Paeto Thrasea est, ita ut peregrinaretur quoque cum eo aliquando, cognatam ejus Arriam habente uxorem, filiam illius, quae marito exemplum mortis simul et solatium fuit, cf. Plin. Epist. III. 11 et 16 deque ipso Thrasea praeter alios multos Wexium ad Tacit. Agric. p. 210 et Schmidt Gesch. d. Denk- und Glaubensfreiheit im ersten Jahrh. p. 352 sqq.

Haec hactenus de adolescentia Persii et familiaribus,

quorum omnium eam conditionem atque indolem fuisse apparet, ut illorum consuetudine morum ejus candor simul cum mentis acumine aleretur, temporum autem depravationi eum eo infestiores reddi necesse esset, quo rariora haec exempla in tanta scelerum omnis generis fertilitate ad eam perfectae et absolutae virtutis imaginem accedere videret, quam ex Stoica disciplina imbibisset; eoque solo pacto explicatur, quomodo adolescens jam ad tantum vitae communis fastidium pervenire potuerit, ut poeticam facultatem, quae in ipso esset, ad satiras potissimum scribendas, hoc est ad illud poesis genus conferre vellet, quod, ut ipse profitetur, indignationis evomendae magis quam lectorum alliciendorum causa capesseretur. Ipse enim, si vitae scriptorem sequimur, fuit morum lenissimorum, verecundiae virginalis, formae pulchrae, pietatis erga matrem et sororem et amitam exemplo sufficientis, idem frugi et pudicus; qui ubi circa HS vices matri et sorori reliquit, scriptis tantum ad matrem codicillis Cornuto rogavit ut daret sestertia, ut quidam, centum, ut alii volunt, argenti facti pondera viginti, et libros circa septingentos Chrysippi — tot enim hunc revera scripsisse testatur etiam Diog. L. VII. 180 — sive bibliothecam suam omnem; verum a Cornuto sublatis libris pecuniam, sororibus, quas frater heredes fecerat, reliquit. Ita codices, quorum in lectione si quid offendit, scriptoris negligentiae tribuendum esse videtur; nunc demum haud scio an sententiarum ordo antiquus turbatus sit, neque statim ad scripta Persii transilire sed ita velut transitum munire debeamus, ut quae vulgo in fine demum leguntur, huc transferamus: *decessit autem vitio stomachi anno aetatis tricesimo, nimirum ex vetere computandi more, quo numerorum termini utrimque tanquam integri comprehenduntur, nisi haec quoque emendando ad accuratorem numerum, quem supra posui, revocare praestat. Adolescentis certe mortem describi sequentia docent, ubi grammaticus: sed, inquit, mox ut a schola et magistris diverſit, lecto libro Lucilii decimo vehementer satiras componere studuit: cujus libri principium imitatus est* — fortasse in ipsius satirae primae exordio, etsi illum versum Scholiasta de primo potius Lucilii translatus esse tradit — *sibi primo, mox omnibus*

*detractus, cum tanta recentium poetarum et oratorum insectatione, ut etiam Neronem illius temporis principem culpaverit, cujus versus in Neronem quum ita se haberet: auriculas asini Mida rex habet, in eum modum a Cornuto, ipso jam tum mortuo (sic Prellerus l. c. p. 44: codd. ipso tantummodo), est emendatus: auriculas asini quis non habet? ne hoc Nero in se dictum arbitraretur. Quanquam de ipsa hujus fabulae auctoritate si ex ea fide existimandum est, quae illi ex critica ejus loci quem spectat conditione accedere videatur, haud profecto magna existet nec multum abest, quin quidquid in his ad Sat. I. 121 pertineat, cum Breitingero et F. C. R. Rittero tanquam scioli commentum ex prava illius loci interpolatione petatum ab antiquae vitae corpore abscindenda et eliminanda esse censeam; cf. Lect. Pers. II, p. 11. Omnino nihil aut a Persii persona aut ab ipsius satirae indole et dignitate alienius cogitari potest, quam si quis illius aculeos, quod olim in quarta maxime satira, nuper etiam in aliis temptatum est, ab universa vitae humanae notatione ad tecta unius hominis ludibria detorqueat; quem etsi concedimus non reipublicae magis quam corruptelae sui saeculi principem et velut antesignanum ab hujus reprehensione eximi nec ipsum potuisse, Persio tamen nunquam eam injuriam faciemus, ut candidissimum adolescentem satiricae poesis gravitate ad libellos famosos abusum esse Lucilique et Horatii nomina venenatorum telorum officinae praefixisse credamus.*

Longe vero alia causa est eorum quae ad totius libelli fortunam et originem pertinentia vulgo antecedunt, nec solum illud ipso satirarum habitu et orationis genere commendatur: *et raro et tarde scripsit*; sed etiam sequentia non est cur in dubitationem vocemus: *hunc ipsum librum imperfectum reliquit*, modo ita haec intelligamus, ut, si diutius vixisset, etiam plures eum satiras additurum fuisse statuamus, non ut ipsas quae exstant rudes et impolitas habitas esse existimemus. Id ipsum adeo est quod grammaticus *versus aliquot demptos esse ait ultimo libro, ut quasi finitus esset*, novae videlicet satirae principium, quod premere Cornutus, quam inchoatum et affectum publicare maluit. Hic enim, ut deinceps legimus, mortuo Persio li-

bellum leviter retractavit et *Caesio Basso petenti, ut ipse ederet, tradidit edendum*; quem jam tum carminibus editis clarum et conspicuum fuisse ipsius Persii appellatio in satirae sextae initio satis ostendit, neque hoc ipso argumento uti recuso ad tuendam lectionem v. 6 *egregius lussisse senex*, quam ex optimo codice Lugdunensi olim erutam etiam nunc in ordinem recipere non dubitavi. Quamvis enim Persii ab hujus adolescentia amicum fuisse Bassum modo legerimus, aequalem tamen Persii fuisse, quod plerique statuerunt, inde non sequitur; immo planissime grammaticus posterius demum ad aequales Persii familiares transit; Bassum, si jam tum poetae nomen meruerat, provectionem aetate fuisse necesse est, sive maxime tunc, quum amicitiam cum Persio adolescentulo junxit, inter juvenes censebatur, hoc moriente facile quinquagesimum annum attigisse poterat, cui aetatis gradui Romani sine ulla dubitatione senectutem concesserunt, cf. Cic. Att. VI. 6, Horat. Satir. II. 1. 34, Liv. XXX. 30, Stat. Silv. IV. 9. 20. De aliis Persii scriptis quae grammaticus compererat, his verbis narrat: *scripserat etiam Flaccus in pueritia praelectam Vescio* — vel quocunque alio nomine haec fabula fuit, quam Heinrichius *Restionem*, Düntzerus *Decium*, Prellerus ex alius Scholii vestigiis *Nasicam*, proxime denique ad literarum ductus accedens Hertzius (philol. klin. Streifzug 1849, p. 27) ex Liv. IX. 25 *Vesciam* inscribi maluit — *et ὁδοποικίαν librum unum et paucos in socrum Thraseae, Arriam matrem, versus, quae se ante virum occiderat*; sed ea omnia, inquit, auctor fuit Cornutus matri ejus ut aboleret, idque consilium ratum fuisse vel inde apparet, quod jam proximae aetatis auctores unum tantum, quod nos quoque tenemus, sex satirarum volumen noverunt; cf. Quintil. X. 1. 94: *multum et verae gloriae quamvis uno libro Persius meruit*, et Martial. IV. 28. 7:

*saepius in libro memoratur Persius uno,  
quam levis in tota Marsus Amazonide.*

At enim hunc, ut ait grammaticus, *editum librum continuo mirari et diripere homines coeperunt*, ejusque studii per omnia deinceps saecula propagati nobis quoque testes et codices sat multi antiquique et Scholia supersunt, quae etsi



Cornuti nomen immerito prae se ferunt, tamen ad eam aetatem ascendunt, quae non modo omnes quotquot exstant codices longe superet, sed etiam puriores genuinae antiquitatis fontes quam hi ipsi adire potuisse videatur. Nam quod Otto Jahnius in editione majore ipsam Scholiorum auctoritatem adeo elevare conatus est, ut ea ad undecimi usque saeculi ineptias deprimeret, virum integerrimum simul et eruditissimum, cui Persius uni plus quam superioribus omnibus in unum collectis debet, illius iudicii errorem dudum abjecisse confido, postquam et Osannus l. c. p. LXII sqq. complura docte contra illum monuit et nos tum in Prooem. lect. Gott. 1846 vel Isidori aetatem Scholia nostra excedere, tum in disp. de Scholiorum ad Juvenalem genere deteriore lectionibus aestivis a. 1849 praemissa tantum inter haec et Pseudo-Cornutiana ad Juvenalem interesse demonstravimus, ut omne illius cornaminis fundamentum labefactatum sit. Ne quis autem ipsi quam nos tuemur Scholiorum aetati Barcinonensem satirarum recensionem aequiparet, quam a nescio quo Fl. Julii Herennii Sabini V. C. protectore domestico a. p. Chr. 402 institutam antiquissimi codices Montispezzulanus et Romanus subscriptione sua testantur, hujus recensionis, etiam si maxime Scholiorum aetatem superet, ipse subscriptor fidem insigniter minuit fatendo se *sine antigrapho emendare temptasse*; ipsi denique quotquot exstant codices, si ab exiguo palimpsesti fragmento Vaticano discesseris, intra nonum vel decimum saeculum scripti sunt; quae quum ita sint, etiam nunc illud teneo, quod in Lectionibus Persianis Marb. 1842 editis professus vel inventis antiquissimis illis libris in Analectis de aetate et usu Scholiorum Persianorum denuo defendi, in constituenda Persii lectione principe loco Scholiorum atque his tacentibus demum quamvis bonorum codicum testimonia audienda esse. Quanquam ne horum quidem tantum ab illis discrimen exstat, ut sive quis nostras sive Jahni rationes sequatur, de satiris satis emendate legendis desperandum sit; immo tanta horum testimoniorum praestantia tantusque in plurimis et gravissimis locis consensus est, ut quod jam ante hos viginti annos in Ephem. Schol. Darmst. 1833,

p. 317 quasi divinans prae me tuli, nunc planissime confirmatum videamus, quidquid ad Persii salutem faciendum restet, multo minus ad critici quam ad interpretis officium pertinere. Interpreti enim quum multae aliae difficultates, quae Persio cum ceteris suae aetatis scriptoribus et poetis communes sunt, tum haec peculiaris objicitur, cujus haud scio an unum inter veteres Heraclitum Ephesium τὸν σκωτικὸν appellatum ille aemulum habuerit (cf. Aristot. Rhetor. III. 5. 6, Theon. Progymn. 14 §. 18), ut passim ancipiti et obscura interpunctione laboret; in critica vero facitanda conjectariam opem vix unus alterque locus desiderat, in lectionum autem varietate, si quis sana et incorrupta via incedat, tam raro haerebit, ut quum ante hos duodecim annos ego Jahnusque suo uterque iudicio verba poetae emendare aggressi essemus, licet a diversissimis principiiis profecti instrumentisque prorsus aliis usi in plerisque ad easdem lectiones deferremur, nunc autem, postquam et Jahnio in editione minore mea et mihi Jahniana subsidia praesto fuerunt, oppido pauci et minuti loci restent, in quibus mihi ab illo dissentendum visum sit. Horum igitur enumeratione huic praefationi finem imponam, ita tamen, ut, ne quis me commentorum meorum tenaciorem esse existimet, simul eos admisceam, in quibus nunc ipse Jahnio auctore ab iis, quae in Lectionibus Persianis proposueram, discessi.

Prol. 4 *Heliconiadas* Lect. III, p. 2, *Heliconidas* Jahn.; mihi poeta epicorum numeros dactylicos respexisse videtur. — V. 9 *picamque* et 12 *refulgeat* c. Jahnio; olim *picasque* et *refulserit*. — Sat. I. 6 *examenve* Lect. II, p. 8, *examenque* Jahn. — V. 8 *ah* c. Jahnio; olim *at*. — V. 9 *tunc*, non *tum*, propter sequentium interpunctionem dudum a me commendatam, ubi v. 11 *tunc* nostri epanalepsis est. — V. 14 *quod* retinui; Jahnus *quo*, quod manifesto correctori debetur; quanquam hunc excusat lectio v. 17 ab eo recepta *leges*, ubi cur ego *legens* servaverim, dixi Lect. II, p. 12. — V. 32 *circa* c. Jahnio; olim *circum*. — V. 66 *dirigat*, non *derigat*, cum Schol. et libris plurimis. — V. 74 *quem* ... *dictaturam* Lect. II, p. 20; vestem dictatoriam *dictaturam* appellat etiam Plin. N. Hist. XVIII. 3 §. 20. —

V. 76 *Brisaei*, non *Brisei*; cf. Steph. Byz. p. 186. — V. 81 *istuc* c. Vatic., *istud* Jahn. — V. 86 *doclas* retinui, ne *figurae* epitheto suo carerent; *doctus*, quod cum Scaligero Jahnus praetulit, post antecedentia languet. — V. 97 *praegrandi* c. Jahnio; olim *vegrandi*, antiqua varietate, quam tamen contra librorum consensum amplius non tueor. — V. 115 *Muci* c. eodem pro *Muti*; cf. Heusdii stud. crit. de Lucilio p. 215. — Sat. II. 14 *conditur* scripsi cum Jahnio, quamvis supparem auctoritate *ducitur* olim tuitus; at cf. Chaeremon ap. Stob. Serm. LXVIII. 22: *γυναικα θάπτειν καὶ ἑστὸν ἔστιν ἢ γαμῆν*. — V. 42 *grandes* Lect. II, p. 26, *pingues* Jahn.; at cf. *grandes rhombos patinasque* Hor. Sat. II. 2. 95, *grandes ollas* Juv. XIV. 171, magisque decet poetam variare epitheta quam eodem sensu duo usurpare; nam *pingues* sunt *crassae*, cf. Weichert poet. reliqu. p. 26. Contra *tucceta* pro *tucetis* libenter ascivi; cf. Hildebr. ad Appul. II. 7, ad Arnob. II. 42. — V. 45 *accersis* Lect. III, p. 10; *arcessis* Jahn.; cf. Wissowa Lect. Tacitin. spec. II, p. 11 sqq. — V. 47 *flammas* cum Jahnio, non *flamma* vel *flammis*. — V. 54 *excutias* Lect. II. p. 28; *excutiati* Jahn. minus poetice, praesertim quum *pectore laevo*, si *cor* proprie intelligatur, abundet. — V. 61 *terris* cum Jahnio; olim *terras*. — V. 62 *hos* Lect. III. 11; *hoc* Jahn.; nobis favet Kritze ad Sallust. Jugurth. IV. 7. — V. 73 *animi* Lect. III, p. 12; *animo* Jahn.; genetivum tuebuntur etiam *verba animi* Juv. IV. 91. — Sat. III. 13 *quod* retinui; sed Jahnus argutius quam verius. — V. 29 *ensoreme* Lect. III, p. 13; *ensoremeque* Jahn. — V. 34 *rursus* Lect. III, p. 14, *rursus* Jahn.; cf. Corte ad Lucan. I. 391. — V. 46 *dicere et insano* Lect. II, p. 33; *discere non sano* Jahnus blanda specie; sed declamandi ineptias ridet, non discendi pigritiam excusat poeta, nec laudes magistri ad memoriam potius quam ad actionem spectare poterant. — V. 56 *deduxit*, non *diduxit*; cf. Sat. V. 35 et Lect. II, p. 35. — V. 60 *in quo* libri fere omnes; *in quod* Jahn. c. editis; at cf. Lect. II, p. 36. Contra v. 67 *et pro aut* scribere c. Jahnio non dubitavi. — V. 68 *quam* Lect. II, p. 37; *qua* Jahn.; at ipsa regendi ars respicitur. — V. 78 *quod satis est sapio* equidem praetuli, *quod sapio satis est*

Jahnus; at nonne hoc etiam philosophus dicere poterat? — Sat. IV. 3 o Lect. II. p. 41; *hoc* Jahn. — V. 26 *milvus oberrat* Schol. librique optimi, alii *oberret*; Jahn. ex unius vestigiis *milvus errat*. — V. 31 *farratam ollam* etiam nunc tueor Statii exemplo Silv. I. 2. 146: *plausuerunt limina cycni*. — V. 33 *frigas* pro *figas* quamvis optimorum testium consensu commendatum nec Jahnus in ordinem recepit, neque ego tantae hypallagae audaciam praestare sustinui; quae tamen in Analectis p. 14 sqq. de universo loco disputavi, haud muto, Jahniumque certe *hi mores* scribendo summam eorum probasse laetor. — Sat. V. 8 *Procnēs* nos cum antiquissimis libris, *Prognēs* Jahnus ut Juv. VI. 644; idem tamen *cycnum* ibid. 145, ut Lachmann. in Lucret. III. 7. — V. 13 *stolppo* Prisc. I. 10. 58, *scloppo* Jahnus, libros magis ut videtur quam suam persuasionem secutus. — V. 17 *dicās* Schol., *dicis* Jahn. contra quam ipse prius edidit, multoque certior conjunctivi ratio constat. — V. 19 *bullatis* multis defendi Lect. I, p. 32, quibus adde *crepantes adulationum bullas* Sidon. Apoll. Epist. I. 7; Jahn. *ampullatis*, quo caesuram perire dudum annotavi, nunc vel in ordinem recepit, Lachmannum testatus ad Lucret. p. 413; ego vero malos versus vel optimis poetis interdum excidisse nunquam negavi, bonos conjectando pessumdari licere etiam nunc pernego. — V. 26 *his* Lect. II, p. 48, *hic* Jahn. — V. 77 *vappa lippus* sine copula libenter cum Jahnio recepi; non item v. 117 *in pro sub pectore*, quo recondita malitia multo vividius describitur. — V. 138 *baro* pro *varo* haud gravate admisi; minus tutum v. 142 *ni* pro *nisi* visum est; v. 149 autem temperare mihi non potui, quin veteri meae conjecturae locum inter verba poetae darem, eo tantum temperamento adhibito, ut *avidos* in *avido* mutari facilius quam in *avidi* videretur; *nummos* vero, non *nummi* scribendum fuisse constanter defendo. *Peragere* enim esse *consumere*, nostrum *durchbringen*, manifesto ostendit Sat. VI. 22, postulatque contrarium sui praecedens *nutrieras*; sicut autem *nummos* quincunx nutrit, ita deunces eosdem peragere rectius quam ipsi ab illis peragi dicentur; utque per se veri absimile est *sudorem* epitheto carere, ita *avidus sudor* commodissime de-

clarabit mercatoris avaritiam, quae tamen tantum abest ut certum eventum habeat, ut haud raro majoris lucri cupidine eam pecuniam perdat, qua modico fenore collocata diu secure frui potuisset. — V. 159 *ast* plurimi, quod vel nonsequente *tamen* suo jure ponipoterat; hoc sequente nec hic nec II. 48 video cur languido *et* cedat. — V. 172 *accersar* pro *arcessat* libris, qui fere omnes primam certe personam offerunt, negare Jahnius non debebat: mox autem v. 174 *exieras nec nunc* pro *exieris et ne nunc* eidem cum Ladewigio et Scheibio eo facilius concedo, quo magis Horatii quoque editores in loco gemino Sat. II. 3. 262 vacillare video; cf. Philol. V, p. 133. — Sat. VI. 9 *cognoscite* pro *cognoscere* cum eodem recepi propter sequens *jubet*, quod imperativum respicit; ibidem vero v. 6 quod e codice Lugd. scripsi *senex* pro *senes*, superius jam tuitus sum, nec transpositionem hemistichiorum v. 37 et 41 pluribus commendare libet, quam quae in eandem sententiam jam Lect. II, p. 61 disputavi. Unum addo, potuisse sane etiam *haec cinere ulterior metuas; at tu meus heres* ab ipso Persio continuari, sed omissis tantum versibus 37—40, qui haud scio an posterius demum ad hunc locum accesserint; iidem tamen quum certissimam poetae manum prae se ferant, hunc ipsum statuendum est adjectis illis eum potius sententiarum ordinem exsistere voluisse, quem singularum nexu arguente restitui. — V. 61 *poscas* Lect. III, p. 33; *poscis* Jahn.; at colligit tantum Persius fieri posse ut alter ad talem impudentiam progrediatur. — V. 66 *repone* elegantius utique est quam *opponere*; item ut opinor v. 69 *coquatur* quam *coquetur*, quorum utrumque Jahnius ipse in superiore editione praetulerat; nec v. 79 *depunge* aut a libris aut a sensu adeo commendari arbitror, ut vel hac in voce Scholiorum auctoritatem Barcinonensi familiae posthabeam; reposui igitur *depinge*, quod nemo erit quin nunc ut alias pro *describe* dictum facile intelligat.

Scr. Gottingae d. II. Iun. a. MDCCCLIV.

---

# A. PERSII FLACCI S A T I R A R U M

LIBER.

## PROLOGUS.

Nec fonte labra prolui caballino,  
Nec in bicipiti somniasse Parnasso  
Memini, ut repente sic poeta prodirem. 5  
Heliconiadasque pallidamque Pirenen  
Illis remitto, quorum imagines lambunt  
Hederae sequaces: ipse semipaganus  
Ad sacra vaturn carmen affero nostrum.  
Quis expedivit psittaco suum *χαίρε*  
Picamque docuit verba nostra conari?  
Magister artis ingenique largitor 10  
Venter, negatas artifex sequi voces;  
Quod si dolosi spes refulgeat nummi,  
Corvos poetas et poetridas picas  
Cantare credas Pegaseium nectar.

## S A T I R A I.

O curas hominum! o quantum est in rebus inane!  
Quis leget haec? — Min' tu istud aïs? nemo hercule! —  
Nemo? —  
Vel duo, vel nemo. — Turpe et miserabile! — Quare?  
Ne mihi Polydamas et Troiades Labeonem  
Praetulerint? nugae! non, si quid turbida Roma  
Elevet, accedas, examenve improbum in illa

PERS. SAT.

Castiges trutina, nec te quaesiveris extra.  
 Nam Romae quis non —? ah si fas dicere! sed fas;  
 Tunc, quum ad canitiem et nostrum istud vivere triste  
 Aspexi ac nucibus facimus quaecumque relictis, 10  
 Quum sapimus patruos; tunc tunc — ignoscite, nolo;  
 Quid faciam? sed sum petulanti splene — cachinno.  
 Scribimus inclusi, numeros ille, hic pede liber,  
 Grande aliquid, quod pulmo animae praelargus anhelet;  
 Scilicet haec populo pexusque togaque recenti 15  
 Et natalicia tandem cum sardonyche albus  
 Sede legens celsa, liquido quum plasmate guttur  
 Mobile collueris, patranti fractus oculo.  
 Hic neque more probo videas nec voce serena  
 Ingentes trepidare Titos, quum carmina lumbum 20  
 Intran, et tremulo scalpuntur ubi intima versu.  
 Tun', vetule, auriculis alienis colligis escas?  
 Auriculis, quibus et dicas cute perditus *ohe!* —  
 Quo didicisse, nisi hoc fermentum et quae semel intus  
 Innata est, rupto iecore, exierit caprificus? — 25  
 En pallor seniumque! O mores! usque adeone  
 Scire tuum nihil est, nisi te scire hoc sciat alter? —  
 At pulchrum est digito monstrari et dicier *hic est!*  
 Ten' cirratorum centum dictata fuisse  
 Pro nihilo pendas? — Ecce inter pocula quaerunt 30  
 Romulidae saturi, quid dia poemata narrent.  
 Hic aliquis, cui circa humeros hyacinthina laena est,  
 Rancidulum quiddam balba de nare locutus,  
 Phyllidas, Hypsipylas, vatum et plorabile si quid,  
 Eliquat, ac tenero supplantat verba palato. 35  
 Assensere viri; nunc non cinis ille poetae  
 Felix? non levior cippus nunc imprimit ossa?  
 Laudant convivae; nunc non e manibus illis,  
 Nunc non e tumulto fortunataque favilla  
 Nascentur violae? — Rides, ait, et nimis uncis 40  
 Naribus indulges; an erit qui velle recuset  
 Os populi meruisse; et cedro digna locutus  
 Linquere nec scombros metuentia carmina nec tus? —  
 Quisquis es, o, modo quem ex adverso dicere feci,

Non ego, quum scribo, si forte quid aptius exit — 45  
 Quando haec rara avis est — si quid tamen aptius exit,  
 Laudari metuum, neque enim mihi cornea fibra est;  
 Sed recti finemque extremumque esse recuso  
 Euge tuum et belle. Nam belle hoc excute totum:  
 Quid non intus habet? non hic est Ilias Atti 50  
 Ebria veratro? non si qua elegidia crudi  
 Dictarunt proceres? non quidquid denique lectis  
 Scribitur in citreis? Calidum scis ponere sumen,  
 Scis comitem horridulum trita donare lacerna,  
 Et: *verum*, inquis, *amo: verum mihi dicite de me.* 55  
 Qui pote? vis dicam? nugaris, quum tibi, calve,  
 Pinguis aqualiculus protenso sesquipede exstet.  
 O lane, a tergo quem nulla ciconia pinsit,  
 Nec manus auriculas imitari mobilis albas,  
 Nec linguae, quantum sitiât canis Appula, tantae! 60  
 Vos, o patricius sanguis, quos vivere fas est  
 Occipiti caeco, posticae occurrite sannae!  
 Quis populi sermo est? quis enim, nisi carmina molli  
 Nunc demum numero fluere, ut per leve severos  
 Effundat iunctura unguis? Scit tendere versum 65  
 Non secus ac si oculo rubricam dirigat uno;  
 Sive opus in mores, in luxum, in prandia regum  
 Dicere, res grandes nostro dat Musa poetae.  
 Ecce modo heroas sensus afferre videmus  
 Nugari solitos graece, nec ponere lucum 70  
 Artifices nec rus saturum laudare, ubi corbes  
 Et focus et porci et fumosa Palilia foeno,  
 Unde Remus sulcoque terens dentalia, Quinti,  
 Quem trepida ante boves dictaturam induit uxor  
 Et tua aratra domum lictor tulit — euge poeta! 75  
 Est nunc Brisaei quem venosus liber Acci,  
 Sunt quos Pacuviusque et verrucosa moretur  
 Antiopa, aerumnis cor luctificabile fulta?  
 Hos pueris monitus patres infundere lippos  
 Quum videas, quaerisne, unde haec sartago loquendi 80  
 Venerit in linguas, unde istuc dedecus, in quo  
 Trossulus exsultat tibi per subsellia levis?



Nilne pudet capiti non posse pericula cano  
 Pellere, quin tepidum hoc optes audire. *decenter?*  
 Fur es, ait Pedio; Pedius quid? crimina rasis 85  
 Librat in antithetis, doctas posuisse figuras  
 Laudatur: *bellum hoc!* Hoc bellum? an, Romule, ceves?  
 Men' moveat quippe et, cantet si naufragus, assem  
 Protulerim? cantas, quum fracta te in trabe pictum  
 Ex humero portes? verum nec nocte paratum 90  
 Plorabit, qui me volet incurvasse querella. —

Sed numeris decor est et iunctura addita crudis.  
 Claudere sic versum didicit: *Berecynthius Attis;*  
 Et: *qui caeruleum dirimebat Nerea delphin;*  
 Sic: *costam longo subduximus Appennino.* 95  
 Arma virum, nonne hoc spumosum et cortice pingui,  
 Ut ramale vetus praegrandi subere coctum? —  
 Quidnam igitur tenerum et laxa cervice legendum?  
 Torva mimalloneis implerunt cornua bombis,  
 Et raptum vitulo caput ablatura superbo 100  
 Bassaris et lyncem Maenas flexura corymbis  
 Euhion ingeminat; reparabilis adsonat echo?  
 Haec fierent, si testiculi vena ulla paterni  
 Viveret in nobis? summa delumbe saliva  
 Hoc natat in labris, et in udo est Maenas et Attis, 105  
 Nec pluteum caedit, nec demorsos sapit ungues. —

Sed quid opus teneras mordaci radere vero  
 Auriculas? vide sis, ne maiorum tibi forte  
 Limina frigescant; sonat hic de nare canina  
 Littera. — Per me equidem sint omnia protinus alba; 110  
 Nil moror. Euge! omnes, omnes bene mirae eritis res.  
 Hoc iuvat? Hic, inquis, veto quisquam faxit oletum?  
 Pinge duos angues: pueri, sacer est locus, extra  
 Meiite! discedo. Secuit Lucilius urbem,  
 Te Lupe, te Muci, et genuinum fregit in illis; 115  
 Omne vafer vitium ridenti Flaccus amico  
 Tangit et admissus circum praecordia ludit,  
 Callidus excusso populum suspendere naso:  
 Men' mutare nefas? nec clam, nec cum scrobe, nusquam?  
 Hic tamen infodiam: vidi, vidi ipse, libelle: 120

Auriculas asini quis non habet? hoc ego opertum,  
 Hoc ridere meum, tam nil, nulla tibi vendo  
 Iliade. Audaci quicumque afflate Cratino  
 Iratum Eupolidem praegrandi cum sene palles,  
 Aspice et haec, si forte aliquid decoctius audis. 125  
 Inde vaporata lector mihi ferveat aure:  
 Non hic, qui in crepidas Graiorum ludere gestit  
 Sordidus, et lusco qui possit dicere *lusce*,  
 Sese aliquem credens, Italo quod honore supinus  
 Fregerit heminas Arreti aedilis iniquas; 130  
 Nec qui abaco numeros et secto in pulvere metas  
 Scit risisse vafer, multum gaudere paratus,  
 Si Cynico barbam petulans nonaria vellat.  
 His mane edictum, post prandia Calliroen do.

## S A T I R A II.

Hunc, Macrine, diem numera meliore lapillo,  
 Qui tibi labentes apponit candidus annos;  
 Funde merum genio. Non tu prece poscis emaci,  
 Quae nisi seductis nequeas committere divis;  
 At bona pars procerum tacita libabit acerra. 5  
 Haud cuivis promptum est murmurque humilesque susurros  
 Tollere de templis et aperto vivere voto.  
*Mens bona, fama, fides*, haec clare et ut audiat hospes;  
 Illa sibi introrsum et sub lingua murmurat: O si  
 Ebulliat patruus, praeclarum funus! et: O si 10  
 Sub rastro crepet argenti mihi seria dextro  
 Hercule! pupillumve utinam, quem proximus heres  
 Impello, expungam! namque est scabiosus, et acri  
 Bile tumet. Nerio iam tertia conditur uxor! —  
 Haec sancte ut poscas, Tiberino in gurgite mergis 15  
 Mane caput bis terque et noctem flumine purgas?  
 Heus age, responde — minimum est quod scire laboro —  
 De Iove quid sentis? estne ut praeponere cures  
 Hunc — cuinam? cuinam? vis Staio? an scilicet haeres?

- Quis potior iudex, puerisve quis aptior orbis? 20  
 Hoc igitur, quo tu Iovis aurem impellere temptas,  
 Dic agendum Staio: *pro Iuppiter! o bone*, clamet,  
*Iuppiter!* at sese non clamet Iuppiter ipse?  
 Ignovisse putas, quia, quum tonat, ocus ilex  
 Sulfure discutitur sacro quam tuque domusque? 25  
 An quia non fibris ovium Ergennaque iubente  
 Triste iaces lucis evitandumque bidental,  
 Idcirco stolidam praebet tibi vellere barbam  
 Iuppiter? aut quidnam est, qua tu mercede deorum  
 Emeris auriculas? pulmone et lactibus unctis? 30  
 Ecce avia aut metuens divum matertera cunis  
 Exemit puerum, frontemque atque uda labella  
 Infami digito et lustralibus ante salivis  
 Expiat, urentes oculos inhibere perita;  
 Tunc manibus quatit et spem macram supplice voto 35  
 Nunc Licini in campos, nunc Crassi mittit in aedes:  
 Hunc optet generum rex et regina; puellae  
 Hunc rapiant; quidquid calcaverit hic, rosa fiat!  
 Ast ego nutrici non mando vota; negato,  
 Iuppiter, haec illi, quamvis te albata rogarit. 40  
 Poscis opem nervis corpusque fidele senectae:  
 Esto age; sed grandes patinae tuccetaque crassa  
 Adnuere his superos vetuere Iovemque morantur.  
 Rem struere exoptas caeso bove, Mercuriumque  
 Accersis fibra: *da fortunare Penates*, 45  
*Da pecus et gregibus fetum!* quo, pessime, pacto,  
 Tot tibi quum in flammis iunicum omenta liquescant?  
 At tamen hic extis et opimo vincere ferto  
 Intendit: *iam crescit ager, iam crescit ovile*,  
*Iam dabitur, iam, iam!* donec deceptus et expes 50  
 Nequiquam: *fundo*, suspiret, *nummus in imo!*  
 Si tibi creterras argenti incusaque pingui  
 Auro dona feram, sudes et pectore laevo  
 Excutias guttas, laetari praetrepidum cor.  
 Hinc illud subiit, auro sacras quod ovato 55  
 Perducis facies; nam fratres inter aenos  
 Somnia pituita qui purgatissima mittunt,

Praecipui sunt sitque illis aurea barba.  
 Aurum vasa Numae Saturniaque impulit aera,  
 Vestalesque urnas et Tuscum fictile mutat. 60  
 O curvae in terris animae et coelestium inanes!  
 Quid iuvat, hos templis nostros immittere mores,  
 Et bona dis ex hac scelerata ducere pulpa?  
 Haec sibi corrupto casiam dissolvit olivo,  
 Haec Calabrum coxit vitiatum murice vellus, 65  
 Haec baccam conchae rasisse et stringere venas  
 Ferventis massae crudo de pulvere iussit.  
 Peccat et haec, peccat: vitio tamen utitur; at vos  
 Dicite, pontifices, in sancto quid facit aurum?  
 Nempe hoc quod Veneri donatae a virgine pupae. 70  
 Quin damus id superis, de magna quod dare lance  
 Non possit magni Messallae lippa propago:  
 Compositum ius fasque animi, sanctosque recessus  
 Mentis, et incoctum generoso pectus honesto.  
 Haec cedo ut admoveam templis, et farre litabo. 75

## S A T I R A III.

Nempe haec assidue? iam clarum mane fenestras  
 Intrat et angustas extendit lumine rimas;  
 Stertimus indomitum quod despumare Falernum  
 Sufficiat, quinta dum linea tangitur umbra.  
 En quid agis? — *Siccas insana canicula messes* 5  
*Iam dudum coquit et patula pecus omne sub ulmo est,*  
 Unus ait comitum. — Verumne? itane? ocus adsit  
 Huc aliquis! nemon'? — Turgescit vitrea bilis:  
 Findor — ut Arcadiae pecuaria rudere dicas.  
 Iam liber et positus bicolor membrana capillis 10  
 Inque manus chartae nodosaque venit arundo.  
 Tunc querimur, crassus calamo quod pendeat humor,  
 Nigra quod infusa vanescat sepiæ lympha;  
 Dilutas querimur gemit quod fistula guttas.  
 O miser inque dies ultra miser, hucine rerum 15

Venimus? at cur non potius teneroque columbo  
 Et similis regum pueris pappare minutum  
 Poscis et iratus mammae lallare recusas? —  
 An tali studeam calamo? — Cui verba? quid istas  
 Succinis ambages? tibi luditur; effluvis amens; 20  
 Contemnere! Sonat vitium percussa, maligne  
 Respondet viridi non cocta fidelia limo.  
 Udum et molle lutum es, nunc nunc properandus et acri  
 Pingendus sine fine rota. Sed rure paterno  
 Est tibi far modicum, purum et siue labe salinum — 25  
 Quid metuas? — cultrixque foci secura patella.  
 Hoc satis? an deceat pulmonem rumpere ventis,  
 Stemmate quod Tusco ramum millesime ducis,  
 Censoremve tuum vel quod trabeate salutas?  
 Ad populum phaleras! ego te intus et in cute novi. 30  
 Non pudet ad morem discincti vivere Nattae?  
 Sed stupet hic vitio, fibris increvit opimum  
 Pingue, caret culpa, nescit quid perdat, et alto  
 Demersus summa rursum non bullit in unda.  
 Magne pater divum, saevos punire tyrannos 35  
 Haud alia ratione velis, quum dira libido  
 Moverit ingenium ferventi tincta veneno:  
 Virtutem videant intabescantque relicta.  
 Anne magis Siculi gemuerunt aera iuveni,  
 Et magis auratis pendens laquearibus ensis 40  
 Purpureas subter cervices terruit, *imus*,  
*Imus praecipites*, quam si sibi dicat et intus  
 Palleat infelix, quod proxima nesciat uxor?  
 Saepe oculos, memini, tangebam parvus olivo,  
 Grandia si nollem morituri verba Catonis 45  
 Dicere et insano multum laudanda magistro,  
 Quae pater adductis sudans audiret amicis.  
 Iure; etenim id summum, quid dexter senio ferret,  
 Scire erat in voto; damnosa canicula quantum  
 Raderet; angustae collo non fallier orcae; 50  
 Neu quis callidior buxum torquere flagello.  
 Haud tibi inexpertum curvos deprendere mores,  
 Quaeque docet sapiens braccatis illita Medis

Porticus, insomnis quibus et detonsa iuventus  
 Invigilat, siliquis et grandi pasta polenta; 55  
 Et tibi quae Samios deduxit littera ramos  
 Surgentem dextro monstravit limite callem.  
 Stertis adhuc, laxumque caput compage soluta  
 Oscitat hesternum, dissutis undique malis!  
 Est aliquid quo tendis, et in quo dirigis arcum? 60  
 An passim sequeris corvos testaque lutoque,  
 Securus quo pes ferat, atque ex tempore vivis?  
 Helleborum frustra, quum iam cutis aegra tumebit,  
 Poscentes videas: venienti occurrite morbo!  
 Et quid opus Cratero magnos promittere montes? 65  
 Discite, o miseri, et causas cognoscite rerum:  
 Quid sumus, et quidnam victuri gignimur; ordo  
 Quis datus, aut metae quam mollis flexus et unde;  
 Quis modus argenteo, quid fas optare, quid asper  
 Utile nummus habet; patriae carisque propinquis 70  
 Quantum elargiri deceat; quem te deus esse  
 Iussit, et humana qua parte locatus es in re;  
 Disce, nec invides, quod multa fidelia putet  
 In locuplete penu, defensis pinguibus Umbris,  
 Et piper et pernae, Marsi monumenta clientis, 75  
 Menaque quod prima nondum defecerit orca.  
 Hic aliquis de gente hircosa centurionum  
 Dicat: Quod satis est sapio mihi; non ego curo  
 Esse quod Arcesilas aerumnosique Solones,  
 Obstipo capite et figentes lumine terram, 80  
 Murmura quum secum et rabiosa silentia rodunt  
 Atque exporrecto trutinantur verba labello,  
 Aegroti veteris meditantés somnia, gigni  
 De nihilo nihilum, in nihilum nil posse reverti.  
 Hoc est, quod palles? cur quis non prandeat, hoc est? — 85  
 His populus ridet, multumque torosa iuventus  
 Ingeminat tremulos naso crispante cachinnos. —  
 Inspice; nescio quid trepidat mihi pectus et aegris  
 Faucibus exsuperat gravis halitus; inspice, sodes!  
 Qui dicit medico, iussus requiescere, postquam 90  
 Tertia compositas vidit nox currere venas,

De maiore domo, modice sitiente lagena,  
 Lenia loturo sibi Surrentina rogabit. —  
 Heus, bone, tu palles! — Nihil est. — Videas tamen istud,  
 Quidquid id est: surgit tacite tibi lutea pellis. — 95  
 At tu deterius palles; ne sis mihi tutor;  
 Iam pridem hunc sepeli: tu restas. — Perge, tacebo. —  
 Turgidus hic epulis atque albo ventre lavatur,  
 Guttare sulfureas lente exhalante mēstēs;  
 Sed tremor inter vina subit, calidumque trientem 100  
 Excutit e manibus, dentes crepuere relecti,  
 Uncta cadunt laxis tunc pulmentaria labris.  
 Hinc tuba, candelae, tandemque beatulus alto  
 Compositus lecto crassisque lutatus amomis  
 In portam rigidas calces extendit: at illum 105  
 Hesterni capite induto subiere Quirites.  
 Tange, miser, venas et pone in pectore dextram. —  
 Nil calet hic. — Summosque pedes attinge manusque. —  
 Non frigent. — Visa est si forte pecunia, sive  
 Candida vicini subrisit molle puella, 110  
 Cor tibi rite salit? positum est argente catino  
 Durum olus, et populi cribro decussa farina:  
 Temptemus fauces! tenero latet ulcus in ore  
 Putre, quod haud deceat plebeia radere beta.  
 Alges, quum excussit membris timor albus aristas; 115  
 Nunc face supposita fervescit sanguis et ira  
 Scintillant oculi, dicisque facisque, quod ipse  
 Non sani esse hominis non sanus iuret Orestes.

#### S A T I R A IV.

Rem populi tractas? — barbatum haec crede magistrum  
 Dicere, sorbitio tollit quem dira cicutae —  
 Quo fretus? dic o magni pupille Pericli.  
 Scilicet ingenium et rerum prudentia velox  
 Ante pilos venit, dicenda tacendaque calles. 6  
 Ergo ubi commota fervet plebecula bile,

Fert animus calidae fecisse silentia turbae  
 Maiestate manus. Quid deinde loquere? *Quirites,*  
*Hoc, puta, non iustum est, illud male, rectius illud.*  
 Scis etenim iustum gemina suspendere lance 10  
 Ancipitis librae; rectum discernis, ubi inter  
 Curva subit, vel quum fallit pede regula varo,  
 Et potis es nigrum vitio praefigere theta?  
 Quin tu igitur, summa nequiquam pelle decorus,  
 Ante diem blando caudam iactare popello 15  
 Desinis, Anticyras melior sorbere meracas!  
 Quae tibi summa boni est? uncta vixisse patella  
 Semper et assiduo curata cuticula sole?  
 Expecta, haud aliud respondeat haec anus. I nunc:  
*Dinomaches ego sum, suffla, sum candidus* — esto; 20  
 Dum ne deterius sapiat pannucia Baucis,  
 Quum bene discincto cantaverit ocima vernae.  
 Ut nemo in sese temptat descendere, nemo,  
 Sed praecedenti spectatur mantica tergo!  
 Quaesieris: Nostin' Vettidi praedia? — Cuius? — 25  
 Dives arat Curibus quantum non milvus obeerrat. —  
 Hunc ais, hunc dis iratis genioque sinistro,  
 Qui, quandoque iugum pertusa ad compita figit,  
 Seriolae veterem metuens deradere limum  
 Ingemit: *hoc bene sit!* tunicatum cum sale mordens 30  
 Caepe, et farratam pueris plaudentibus ollam  
 Pannosam faecem morientis sorbet aceti? —  
 At si unctus cesses et figas in cute solem,  
 Est prope te ignotus, cubito qui tangat et acre  
 Despuat: *hi mores, penemque arcanaque lumbi* 35  
*Runcantem populo marcentes pandere vulvas!*  
 Tu quum maxillis balanatum gausape pectas,  
 Inguinibus quare detonsus gurgulio exstat?  
 Quinque palaestritae licet haec plantaria vellant,  
 Elixasque nates labefactent forcipe adunca, 40  
 Non tamen ista filix ullo mansuescit aratro.  
 Caedimus, inque vicem praebemus crura sagittia.  
 Vivitur hoc pacto; sic novimus. Ilia subter  
 Caecum vulnus habes; sed lato balteus auro



Praetegit. Ut mavis, da verba et decipe nervos, 45  
 Si potes. — Egregium quum me vicina dicat,  
 Non credam? — Viso si palles, improbe, nummo,  
 Si facis in penem quidquid tibi venit amarum,  
 Si puteal multa cautus vibice flagellas:  
 Nequiquam populo bibulas donaveris aures. 50  
 Respue, quod non es; tollat sua munera cerdo;  
 Tecum habita: noris, quam sit tibi curta supellex.

## S A T I R A V.

Vatis hic mos est, centum sibi poscere voces,  
 Centum ora et linguas optare in carmina centum,  
 Fabula seu moesto ponatur hianda tragoedo,  
 Vulnera seu Parthi ducentis ab inguine ferrum. —  
 Quorsum haec? aut quantas robusti carminis offas 5  
 Ingeris, ut par sit centeno gutture niti?  
 Grande locuturi nebulas Helicone legunto,  
 Si quibus aut Procnes, aut si quibus olla Thyestae  
 Fervebit, saepe insulso coenanda Glyconi;  
 Tu neque anhelasti, coquitur dum massa camino, 10  
 Folle premis ventos, nec clauso marmure raucus  
 Nescio quid tecum grave cornicaris inepte,  
 Nec stloppo tumidas intendis rumpere buccas.  
 Verba togae sequeris iunctura callidus acri,  
 Ore teres modico, pallentes radere mores 15  
 Doctus et ingenuo culpam defigere ludo.  
 Hinc trahere quae dicas, mensasque relinque Mycenis  
 Cum capite et pedibus, plebeiaque prandia noris. —  
 Non equidem hoc studeo, bullatis ut mihi nugis  
 Pagina turgescat, dare pondus idonea fumo. 20  
 Secreti loquimur: tibi nunc, hortante Camena,  
 Excutienda damus praecordia, quantaque nostrae  
 Pars tua sit, Cornute, animae, tibi, dulcis amice,  
 Ostendisse iuvat: pulsa, dinoscere cautus,  
 Quid solidum. cernat et pictae tectoria linguae. 25

His ego centenas ausim deposcere voces,  
 Ut, quantum mihi te sinuoso in pectore fixi,  
 Voce traham pura, totumque hoc verba resignent,  
 Quod latet arcana non enarrabile fibra.  
 Quum primum pavido custos mihi purpura cessit, 30  
 Bullaque succinctis Laribus donata pependit;  
 Quum blandi comites totaque impune Subura  
 Permisit sparsisse oculos iam candidus umbo;  
 Quumque iter ambiguum est et vitae nescius error  
 Deducit trepidas ramosa in compita mentes, 35  
 Me tibi supposui: teneros tu suscipis annos  
 Socratico, Cornute, sinu; tum fallere sollers  
 Apposita intortos extendit regula mores,  
 Et premitur ratione animus vincique laborat,  
 Artificemque tuo ducit sub pollice vultum. 40  
 Tecum etenim longos memini consumere soles,  
 Et tecum primas epulis decerpere noctes:  
 Unum opus et requiem pariter disponimus ambo,  
 Atque verecunda laxamus seria mensa.  
 Non equidem hoc dubites, amborum foedere certo 45  
 Consentire dies et ab uno sidere duci:  
 Nostra vel aequali suspendit tempora Libra  
 Parca tenax veri, seu nata fidelibus hora  
 Dividit in Geminos concordia fata duorum,  
 Saturnumque gravem nostro Iove frangimus una: 50  
 Nescio quod, certe est quod me tibi temperat astrum.  
 Mille hominum species et rerum discolor usus;  
 Velle suum cuique est, nec voto vivitur uno.  
 Mercibus hic Italis mutat sub sole recenti  
 Rugosum piper et pallentis grana cumini, 55  
 Hic satur irriguo mavult turgescere somno;  
 Hic campo indulget; hunc alea decoquit; ille  
 In Venerem putris; sed quum lapidosa cheragra  
 Fregerit articulos, veteris ramalia fagi,  
 Tunc crassos transisse dies lucemque palustrem 60  
 Et sibi iam seri vitam ingemuere relictam.  
 At te nocturnis iuvat impallescere chartis;  
 Cultor enim iuvenum purgatas inseris aures

Fruge Cleanthea: petite hinc puerique senesque  
 Finem animo certum miserisque viatica canis! — 65  
 Cras hoc fiet idem. — Cras fiet? — Quid? quasi magnum  
 Nempe diem donas! — Sed quum lux altera venit,  
 Iam cras hesternum consumpsimus: ecce aliud cras  
 Egerit hos annos et semper paulum erit ultra.  
 Nam quamvis prope te, quamvis temone sub uno 70  
 Vertentem sese frustra sectabere canthum,  
 Quum rota posterior curras et in axe secundo.  
 Libertate opus est, non hac, ut, quisque Velina  
 Publius emeruit, scabiosum tesserula far  
 Possidet. Heu steriles veri, quibus una Quiritem 75  
 Vertigo facit! hic Dama est non tressis agaso,  
 Vappa lippus et in tenui farragine mendax:  
 Verterit hunc dominus, momento turbinis exit  
 Marcus Dama: papae! Marco spondente recusas  
 Credere tu nummos? Marco sub iudice palles? 80  
 Marcus dixit: ita est; adsigna, Marce, tabellas.  
 Haec mera libertas! hoc nobis pilea donant! —  
 An quisquam est alius liber, nisi ducere vitam  
 Cui licet, ut voluit? licet ut volo vivere: non sum  
 Liberior Bruto? — Mendose colligis, inquit 85  
 Stoicus hic aurem mordaci lotus aceto:  
 Haec reliqua accipio; *licet* illud et *ut volo* tolle. —  
 Vindicta postquam meus a praetore recessi,  
 Cur mihi non liceat, iussit quodcumque voluntas,  
 Excepto si quid Masuri rubrica vetavit? — 90  
 Disce, sed ira cadat naso rugosaeque sanna,  
 Dum veteres avias tibi de pulmone revello.  
 Non praetoris erat stultis dare tenuia rerum  
 Officia atque usum rapidae permittere vitae:  
 Sambucam citius caloni aptaveris alto. 95  
 Stat contra ratio et secretam garrit in aurem,  
 Ne liceat facere id quod quis vitiabit agendo.  
 Publica lex hominum naturaque continet hoc fas,  
 Ut teneat vetitos inscitia debilis actus.  
 Diluis helleborum, certo compescere puncto 100  
 Nescius examen: vetat hoc natura medendi:

Navem si poscat sibi peronatus arator,  
 Luciferi rudis, exclamet Melicerta perisse  
 Frontem de rebus. Tibi recto vivere talo  
 Ars dedit, et veri speciem dinoscere calles, 106  
 Ne qua subaerato mendosum tinniat auro?  
 Quaeque sequenda forent, quaeque evitanda vicissim,  
 Illa prius creta, mox haec carbone notasti?  
 Es modicus voti? presso lare? dulcis amicis?  
 Iam nunc astringas, iam nunc granaria laxes? 110  
 Inque luto fixum possis transcendere nummum,  
 Nec glutto sorbere salivam Mercurialem?  
*Haec mea sunt, teneo*, quum vere dixeris, esto  
 Liberque ac sapiens, praetoribus ac Iove dextro.  
 Sin tu, quum fueris nostrae paulo ante farinae, 115  
 Pelliculam veterem retines et fronte politus  
 Astutam vapido servas sub pectore vulpem,  
 Quae dederam supra, relego, funemque reduco:  
 Nil tibi concessit ratio; digitum exsere, peccas,  
 Et quid tam parvum est? sed nullo ture litabis, 120  
 Haereat in stultis brevis ut semuncia recti.  
 Haec miscere nefas; nec, quum sis cetera fossor,  
 Tres tantum ad numeros satyrum moveare Bathylli. —  
 Liber ego. — Unde datum hoc sentis, tot subdite rebus?  
 An dominum ignoras, nisi quem vindicta relaxat? 125  
*I puer et strigiles Crispini ad balnea defer*,  
 Si increpuit, cessas nugator; servitium acre  
 Te nihil impellit, nec quidquam extrinsecus intrat,  
 Quod nervos agitet; sed si intus et in iecore aegro  
 Nascuntur domini, qui tu impunitior exis 130  
 Atque hic, quem ad strigiles scutica et metus egit herilis?  
 Mane piger stertis. — Surge, inquit Avaritia, heia  
 Surge! — Negas; instat: Surge, inquit. — Non queo. —  
 Surge. —  
 Et quid agam? — Rogitas? en saperdam advehe Ponto,  
 Castoreum, stuppas, ebum, tus, lubrica Coa; 135  
 Tolle recens primus piper ex sitiente camelo;  
 Verte aliquid; iura. — Sed Iuppiter audiet. — Eheu!  
 Baro, regustatum digito terebrare salinum

Contentus perages, si vivere cum Iove tendis! —  
 Iam pueris pellem succinctus et oenophorum aptas: 140  
 Ocius ad navem! nihil obstat, quin trabe vasta  
 Aegaeum rapias, nisi sollers Luxuria ante  
 Seductum moneat: Quo deinde, insane, ruis? quo?  
 Quid tibi vis? calido sub pectore mascula bilis  
 Intumuit, quam non exstinxerit urna cicutae? 145  
 Tun' mare transilias? tibi torta cannabe fulto  
 Coena sit in transtro, Veientanumque rubellum  
 Exhalet vapida laesum pice sessilis obba?  
 Quid petis? ut nummos, quos hic quincunce modesto  
 Nutrieras, peragant avido sudore deunces? 150  
 Indulge genio, carpamus dulcia! nostrum est  
 Quod vivis; cinis et manes et fabula fies.  
 Vive memor leti! fugit hora; hoc quod loquor inde est. —  
 En quid agis? duplici in diversum scinderis hamo.  
 Huncce, an hunc sequeris? subeas alternus oportet 155  
 Ancipiti obsequio dominos, alternus oberres.  
 Nec tu, quum obstiteris semel instantique negaris  
 Parere imperio, *rupi iam vincula*, dicas;  
 Nam et luctata canis nodum abripit; ast tamen illi,  
 Quum fugit, a collo trahitur pars longa catenae. — 160  
 Dave, cito, hoc credas iubeo, finire dolores  
 Praeteritos meditor — crudum Chaerestratus unguem  
 Adrodens ait haec — an siccis dedecus obstem  
 Cognatis? an rem patriam rumore sinistro  
 Limen ad obscenum frangam, dum Chrysidis udas 165  
 Ebrius ante fores extincta cum face canto? —  
 Euge, puer, sapias, dis depellentibus agnam  
 Percute. — Sed censen' plorabit, Dave, relicta? —  
 Nugaris; solea, puer, obiurgabere rubra.  
 Ne trepidare velis atque artos rodere casses! 170  
 Nunc ferus et violens; at si vocet, *haud mora*, dicas. —  
 Quidnam igitur faciam? nec nunc, quum accersar et ultro  
 Supplicet, accedam? — Si totus et integer illinc  
 Exieras, nec nunc. — Hic, hic, quem quaerimus, hic est,  
 Non in festuca, lictor quam lactat ineptus. 175  
 Ius habet ille sui palpo, quem ducit hiantem

Cretata ambitio? vigila et ciceringere large  
 Rixanti populo, nostra ut Floralia possint  
 Aprici meminisse senes; quid pulchrius? At quum  
 Herodis venere dies, unctaque fenestra 180  
 Dispositae pinguem nebulam vomuere lucernae  
 Portantes violas, rubrumque amplexa catinum  
 Cauda natat thynni, tumet alba fidelia vino:  
 Labra moves tacitus recutitaque sabbata palles.  
 Tum nigri lemures ovoque pericula rupto, 185  
 Tum grandes galli et cum sistro lusca sacerdos  
 Incussere deos inflantes corpora, si non  
 Praedictum ter mane caput gustaveris alli.  
 Dixeris haec inter varicosos centuriones,  
 Continuo crassum ridet Pulfennius ingens, 190  
 Et centum Graecos curto centusse licetur.

## S A T I R A VI.

Admovit iam bruma foco te, Basse, Sabino?  
 Iamne lyra et tetrico vivunt tibi pectine chordae?  
 Mire opifex numeris veterum primordia vocum  
 Atque marem strepitum fidis intendisse latinae,  
 Mox iuvenes agitare iocos et pollice honesto 5  
 Egregius luisse senex. Mihi nunc Ligus ora  
 Intepet hibernatque meum mare, qua latus ingens  
 Dant scopuli et multa litus se valle receptat.  
*Lunai portum, est operae, cognoscite, cives!*  
 Cor iubet hoc Enni, postquam destertuit esse 10  
 Maeonides, Quintus pavone ex Pythagoreo.  
 Hic ego securus vulgi et quid praeparet auster  
 Infelix pecori, securus et angulus ille  
 Vicini nostro quia pinguior, etsi adeo omnes  
 Ditescant orti peioribus, usque recusem 15  
 Curvus ob id minui senio, aut coenare sine uncto,  
 Et signum in vapida naso tetigisse lagena.  
 Discrepet his alius: geminos, horoscope, varo

Producis genio. Solis natalibus est qui  
 Tingat olus siccum muria vafer in calice empta, 20  
 Ipse sacrum irrorans patinae piper; hic bona dente  
 Grandia magnanimus peragit puer. Utar ego, utar,  
 Nec rhombos ideo libertis ponere lautus,  
 Nec tenues sollers turdarum nosse salivas.  
 Messe tenus propria vive et granaria, fas est, 25  
 Emole; quid metuis? occa, et seges altera in herba est.  
 Ast vocat officium: trabe rupta Bruttia saxa  
 Prendit amicus inops, remque omnem surdaque vota  
 Condidit Ionio; iacet ipse in litore et una  
 Ingentes de puppe dei, iamque obvia mergis 30  
 Costa ratis lacerae: nunc et de cespite vivo  
 Frange aliquid, largire inopi, ne pictus oberret  
 Caerulea in tabula. — Sed coenam funeris heres  
 Negliget, iratus quod rem curtaveris; urnae  
 Ossa inodora dabit, seu spirent cinnama surdum, 35  
 Seu ceraso peccent casiae, nescire paratus. —  
 Haec cinere ulterior metuas? — Et Bestius urget  
 Doctores Graios: *Ita fit, postquam sapere urbi*  
*Cum pipere et palmis venit, nostrum hoc maris expers;*  
*Foenisecae crasso vitiantur unguine pulles.* 40  
 Tune bona incolumis minuas? — At tu, meus heres  
 Quisquis eris, paulum a turba seductior audi:  
 O bone, num ignoras? missa est a Caesare laurus  
 Insignem ob cladem Germanae pubis, et aris  
 Frigidus excutitur cinis, ac iam postibus arma, 45  
 Iam chlamydes regum, iam lutea gausapa captis  
 Essedaque ingentesque locat Caesonia Rhenos.  
 Dis igitur genioque ducis centum paria ob res  
 Egregie gestas induco; quis vetat? aude.  
 Vae, nisi connives! oleum artocreasque popello 50  
 Largior; an prohibes? dic clare! *Non adeo*, inquis,  
*Exossatus ager iuxta est.* Age, si mihi nulla  
 Iam reliqua ex amitis, patruelis nulla, proneptis  
 Nulla manet patrui, sterilis matertera vixit,  
 Deque avia nihilum superest, accedo Bovillas 55  
 Clivumque ad Virbi, praesto est mihi Manius heres. —

Progenies terrae? — Quaere ex me, quis mihi quartus  
 Sit pater: haud prompte, dicam tamen; adde etiam unum,  
 Unum etiam: terrae est iam filius, et mihi ritu  
 Manius hic generis prope maior avunculus exit. 60  
 Qui prior es, cur me in decursu lampada poscas?  
 Sum tibi Mercurius; venio deus huc ego ut ille  
 Pingitur; an renuis? vin' tu gaudere relictis?  
 Deest aliquid summae: minui mihi; sed tibi totum est,  
 Quidquid id est. Ubi sit, fuge quaerere, quod mihi quon-  
 dam 65

Legarat Tadius, neu dicta repone paterna:  
 Fenoris accedat merces; hinc exime sumptus! —  
 Quid reliquum est? — Reliquum? nunc, nunc impensius  
 unge,

Unge, puer, caules! mihi festa luce coquatur  
 Urtica et fissa fumosum sinciput aure, 70  
 Ut tuus iste nepos olim satur anseris extis,  
 Quum morosa vago singultiet inguine vena,  
 Patriciae immetat vulvae? mihi trama figurae  
 Sit reliqua, ast illi tremat omento popa venter?  
 Vende animam lucro, mercare atque excute sollers 75  
 Omne latus mundi, nec sit praestantior alter  
 Cappadocas rigida pingues plausisse catasta;  
 Rem duplica. — Feci; iam triplex, iam mihi quarto,  
 Iam decies redit in rugam: depinge, ubi sistam. —  
 Inventus, Chrysisippe, tui finitor acervi. 80



## ONOMASTICUM PERSIANUM.

---

- Accius I. 76.  
Aegaeum V. 142.  
Anticyra IV. 16.  
Antiopa I. 78.  
Appenninus I. 95.  
Arcadia III. 9.  
Arcesilas III. 79.  
Arretium I. 130.  
Attis I. 93.  
Attius I. 50.  
Bassaris I. 101.  
Bassus VI. I.  
Bathyllus V. 123.  
Baucis IV. 21.  
Berecynthius I. 93.  
Bestius VI. 37.  
Bovillae VI. 55.  
Brutus V. 85.  
Bruttius VI. 27.  
Caesonia VI. 47.  
Calaber II. 65.  
Calliroe I. 134.  
Cappadox VI. 77.  
Cato III. 45.  
Chaerestratus V. 162.  
Chrysippus VI. 80.  
Chrysis V. 165.  
Cleanthes V. 64.  
Coa V. 135.  
Cornutus V. 23. 37.  
Crassus II. 36.  
Craterus III. 65.  
Cratinus I. 123.  
Crispinus V. 126.  
Cures IV. 26.  
Dama V. 76.  
Davus V. 161. 168.  
Dinomache IV. 20.  
Ennius VI. 10.  
Ergenna II. 26.  
Eupolis I. 124.  
Falernum III. 3.  
Flaccus I. 116.  
Floralia V. 178.  
Glycon V. 9.  
Helicon V. 7.  
Heliconiades prol. 4.  
Hercules II. 12.  
Herodes V. 180.  
Hypsipyle I. 34.  
Ianus I. 58.  
Ilias I. 50.  
Ionium VI. 29.  
Iuppiter II. 22. 40; V. 50. 137  
Labeo I. 4.  
Lares V. 31.  
Licinus II. 36.  
Ligus VI. 6.  
Lucilius I. 114.  
Luna VI. 9.  
Lupus I. 115.  
Macrinus II. 1.  
Maenas I. 101.  
Maeonides VI. 11.  
Manius VI. 56.  
Marcus V. 79.  
Marsus III. 75.  
Masurius V. 90.

Medi III. 53.  
Melicerta V. 103.  
Mercurialis V. 112.  
Mercurius II. 44; VI. 62.  
Messala II. 72.  
Mimalloneus I. 99..  
Mucius I. 115.  
Mycenae V. 17.  
Nafta III. 31.  
Nereus I. 94.  
Nerius II. 14.  
Numa II. 59.  
Orestes III. 118.  
Pacuvius I. 77.  
Palilia I. 72.  
Parnassus prol. 2.  
Parthus V. 4.  
Pediis I. 85.  
Pegaseius prol. 14.  
Pericles IV. 3.  
Phyllis I. 34.  
Pirene prol. 4.  
Polydamas I. 4.  
Pontus V. 134.  
Procne V. 8.  
Publius V. 74.  
Pulfeanius V. 190.  
Pythagoreus VI. 11.  
Quintius I. 73.

Quintus VI. 11.  
Remus I. 73.  
Rhenus VI. 47.  
Roma I. 5.  
Romulidae I. 37.  
Romulus I. 87.  
Sabinus VI. 1.  
Samius III. 56.  
Saturnius II. 59.  
Saturnus V. 50.  
Siculus III. 39.  
Socraticus V. 37.  
Solon III. 79.  
Stajus II. 19.  
Subura V. 32.  
Surrentina III. 93.  
Tadius VI. 66.  
Thyestes V. 8.  
Tiberinus II. 15.  
Titus I. 20.  
Troïades I. 4.  
Tuscus II. 60; III. 28  
Umber III. 74.  
Vejentanium V. 147.  
Velina V. 73.  
Venus II. 70; V. 58.  
Vestales II. 60.  
Vettidius IV. 25.  
Virbius VI. 56.



Im Verlage von B. G. Teubner in Leipzig sind erschienen:

**Benseler-Schenkl's**

**Griechisch-deutsches und Deutsch-griechisches**

## **SCHUL-WÖRTERBUCH.**

- I. Band: Griechisch-Deutsch. Von G. E. Benseler. 6. Aufl.  
Besorgt von J. Rieckher. gr. 8. geh. Preis 6 Mark  
75 Pf.
- II. Band: Deutsch-Griechisch. Von K. Schenkl. gr. 8.  
3. Aufl. geh. Preis 9 Mark.
- 

**Wörterbuch zu den Homerischen Gedichten.** Für  
den Schulgebrauch bearbeitet von Georg Antenrieth.  
Mit vielen Holzschnitten und zwei Karten. Zweite ver-  
besserte Auflage. gr. 8. 1877. geh. 3 Mark.

**Wörterbuch zu Xenophon's Anabasis.** Von F. Voll-  
brecht. Mit 75 Holzschnitten, 3 lith. Tafeln und 1 Karte.  
4. Aufl. gr. 8. 1880. geh. 1 Mark 80 Pf.

**Schulwörterbuch zu C. J. Cäsar mit besonderer Verück-  
sichtigung der Phraseologie.** Von Dr. H. Ebeling. 2. Aufl.  
von A. Dräger. gr. 8. geh. 1 Mark.

**Wörterbuch zu den Lebensbeschreibungen des Cornelius  
Repos.** Für den Schulgebrauch herausgegeben von H. Haacke.  
6. Aufl. 8. 1880. geh. 1 Mark. [Mit dem Text des Repos  
1 Mark 20 Pf.]

**Schulwörterbuch zu Cornelius Repos mit besonderer  
Verückichtigung der Phraseologie.** Von Dr. H. Ebeling.  
gr. 8. geh. 80 Pf.

**Wörterbuch zu den Fabeln des Phädrus.** Für den Schul-  
gebrauch herausgegeben von A. Schaubach. 2. Aufl. 8. 1877.  
geh. 60 Pf. [Mit dem Text des Phädrus 90 Pf.]

**Wörterbuch zu Siebelis' tirocinium poeticum.** Von  
A. Schaubach. 5. Aufl. gr. 8. 1880. geh. 45 Pf.

---

Lateinisch-deutsches und deutsch-lateinisches  
**SCHUL-WÖRTERBUCH**

von

**Friedrich Adolph Heinichen,**

Dr. der Phil. und Licentiaten der Theologie, Gymnasialprorector a. D.  
und Professor.

Erster Theil:

**Lateinisch-deutsch.**

3. Aufl. Lex.-8. 1875. geh. 6 Mark.

Zweiter Theil:

**Deutsch-lateinisch.**

3. Aufl. Lex.-8. 1877. geh. 5 Mark.

Dieses neueste lateinische Wörterbuch ist für den ganzen Cursus des Gymnasial-Unterrichts bestimmt und hat bereits in den meisten Schulen Deutschlands Eingang gefunden. Seine Vorzüge vor ähnlichen compendiösen Wörterbüchern sind allgemein anerkannt.

**Wörterbuch**

zu

**Ovid's Metamorphosen.**

Von

**Dr. Johannes Siebelis.**

3. Aufl. Besorgt von Fr. Polle. gr. 8. geh. 2 Mark 70 Pf.

Der durch seine Ausgabe der Metamorphosen (9. Aufl. 1876) und anderer Schulbücher rühmlichst bekannte Verfasser bietet in diesem Wörterbuche ein neues Hilfsmittel für das Verständniß der Metamorphosen, das den Bedürfnissen der Schule und der Wissenschaft gleichseitig Rechnung trägt.

**Fr. Lübker's**

**Reallexikon des classischen Alterthums**

**für Gymnasien.**

**Fünfte durchgängig verbesserte Auflage.**

**Herausgegeben**


von

**Prof. Dr. Max Erler,**

Director des Gymnasiums zu Bwidau.

Lex.-8. Mit vielen Abbildungen. geh. 12 Mark.

Das Buch hat eine so ausserordentlich günstige Aufnahme gefunden, dass vier starke Auflagen rasch hintereinander nöthig wurden. Dasselbe wird vorzugsweise gern zu Prämien benutzt.









Lp 15.8.81

A. Persii flacci Satirarum liber I

Widener Library

006313404



3 2044 085 215 481